



Här Fernand Etgen
President vun der Chamber

Lëtzebuerg, den 6. Juli 2021

Här President,

Esou ewéi den Artikel 80 vum Chambersreglement et virgesäit, bieden mir Iech, dës parlamentaresch Fro un den Här Aussen- an Europaminister ewéi un den Här Staatsminister an un den Här Educationminister weider ze leeden.

Laut der der Recherche et Information sur l'anitsémitisme zu Lëtzebuerg (Rial) bléift den Antisemitismus am Ausland ewéi och zu Lëtzebuerg weider e grouse Problem. D'lescht Joer wier d'Zuel un Incidenten zu Lëtzebuerg vu 50 op 64 eropgaangen. Wärend der Pandemie wieren vermeit rietspopulistesch Verschwierungen opgedaucht an antisemittesch Messagen géifen zudeem zirkuléieren.

Déi lescht Méint wieren och ëmmer erëm extrem lénk pro-palestinensesch Gruppen opgefall. Den Israel-bezunnene Antisemitismus wier nees gewuess. Den Här Bernard Gottlieb, President vun der Rial, huet an engem Interview mat RTL, den 28 Juni 2021 vermierkt datt «ee sech als Minoritéit virun allem eng Volonté politique, fir näischt duerchgoen ze loosse». D'Aktioun vun der Police an der Justiz misst eropgeschrauft ginn am Fall vun «Hatespeech» géint Minoritéiten. Eng weider Fuerderung vun der Rial wier, datt och an de Schoulen d'Memoire vun der Shoah an weider sozial problematesch Sujete besser missten opgeschafft ginn.

An dësem Kontext géife mir gäre folgend Froen un d'Regierung stellen:

- Konnt d'Regierung och feststellen, datt d'Zuel un antisemittesch Incidenten, notamment d'lescht Joer an Luucht gaangen ass, datt vermeit rietspopulistesch Verschwierungen opgedaucht sinn wärend der Pandemie, an datt des weideren och erëm extrem lénk pro-palestinensesch Gruppen opgefall sinn ?
- Gesäit d'Regierung fir d'Minoritéiten zu Lëtzebuerg, wéi déi jiddesch, renforcéiert ze protegéieren, an esou d'Aktioun vun der Police an der Justiz eropzeschrauwen am Fall vun „Hatespeech“ géint dës Minoritéiten ?
 - Falls deem net esou wier, aus wéi engem Grond ?
- Deelt d'Regierung der Rial hier Meenung, datt och an de Schoulen d'Memoire vun der Shoah an weider sozial problematesch Sujete besser missten opgeschafft ginn ?
 - Falls net, wat ass d'Begrënnung dofir ?

Här President, mir bieden Iech eisen déifste Respekt unzehuelen.

Laurent Mosar

Marc Spautz

Deputéiert

Gemeinsam Äntwert vum Här Aussen- an Europaminister, dem Här Staatsminister, dem Här Educatiounsminister an der Madame Justizministerin op d'parlamentaresch Fro n°4619 vum 6. Juli 2021 vun den honorabelen Hären Députéierten Laurent MOSAR an Marc SPAUTZ.

Wéi schonn an der parlamentarescher Fro n°3912 vum 23. März 2021 beäntwert, sinn déi antisemitesch motivéiert Strofdoten net als solch registréiert, well se net ënnert där Form erfaasst ginn. Op där enger Säit kënnen generell ënnert „Discriminatioun an Rassismus“ och vill aner Motiver fale wéi just antisemitesch motivéiert Faiten. Op där anerer Säit kënnen och aner Infractiounen (zum Beispill Coups et blessures volontaires, Injures, asw.) eng antisemitesch Motivatioun hunn, unni dass dat bekannt ass, respektiv statistesch erfaasst gëtt.

D'Zuele vun de Condamnatiounen am Kader vum Artikel 457-1 vum Strofgesetzbuch ginn nëmmen ënnert dem Gesichtspunkt vun deenen eenzelne verbuedene Critèren erhewen. Di antisemitesch Opriff zum Haass an/oder zur Gewalt fannen sech deemno an der Catégorie vun de Commentaire géint Leit oder e Grupp oder eng Communautéit vu Leit op Grond vun hirer reeller oder ugehollener Zougehéiregkeet zu enger bestëmmter Relioun erëm.

Do gouf et, fir di zwee Arrondissementer zesummen, 2019 eng eenzeg Condamnatioun, an 2020 waren et der dräi. Di zwee Joeren ergoung keen Acquittement an därer Matière.

D'Regierung huet sech ëmmer vehement géint d'Zouam vun Haass an Intoleranz engagéiert. Hir Akkumulatioun a Verbreedung op de sozialen Netzwierker, Bloggen a Foren, ass eng regelrecht Haasskultur mat enger globaler Dimensioun, déi muss bekämpft ginn.

D'Regierung bedauert, dass am Kontext vun der Gesondheetskrisis vulnérabel Leit esou wéi Leit déi enger ethnescher oder reliéiser Minoritéit ugehéieren am meeschten stigmatiséiert ginn.

D'Regierung ass besonnesch besuergt iwwer d'Publikatioun vun der Europäescher Kommissioun am Abrëll 2021 vum Bericht " *The Rise of Antisemitism Online During the Pandemic* " aus deem eng 7-fach Erhéijung vum antisemiteschen Inhalt online op Franséisch an eng 13-fach Erhéijung vum antisemiteschen Inhalt online op Däitsch ervir geet. Dësen Trend geet leider och aus der Juli 2020 Étude vun der LIBE Kommissioun am Europa Parlament „*Hate Speech and Hate crime in the EU and the Evaluation of Online Content Regulation Approaches*“, ervir. Vun den traditionell geschützte Gruppen, ass d'jiddeesch Gemeinschaft déjéineg di während enger Pandemie am stäerksten betraff ass.

An dësem Kontext ass d'Regierung der Iwwerzeugung, dass d'Mesuren déi d'Police an d'Justizautoritéiten ergraff hunn am Kampf géint den „*hate speech*“ wéi se am Kader vun der parlamentarescher Fro n° 3918 entwéckelt goufen, efficace sinn fir déi reliéis Minoritéit mat jiddeschem Glawen géint den „*hate speech*“ ze schützen. D'Regierung ass awer ëmmer oppen fir nei respektiv zousätzlech Weeër an dësem Beräich ze goen falls déi sech géingen erginn.

An deem Kontext, a wéi och schonn an der Äntwert op parlamentarescher Fro n°4161 vum 27. Abrëll 2021 präziséiert, ass d'Regierung am Gaang verschidde Pisten auszeschaffen fir Donnéeën iwwert antisemitesch Incidenter méi breet ze erfassen wéi eleng strofrechtlech Affairen.

Den Enseignement vun der Shoah an de Schoulen ass e wichtege Pilier vun der Mémoirespolitik vun der Regierung. An deem Sënn gëtt den Enseignement vun der Shoah och konstant adaptéiert fir den

Erausforderungen vun onser Zäit gerecht ze ginn a virun allem d'Transmissioun vun der Mémoire vun der Shoah un déi jonk Generatiounen ze festegen.

An deem Kontext huet den Éducatiounsminister de 4 Juni 2019 e Partenariat mat *Yad Vashem* ënnerschriwwen fir esou dem Enseignements- an Éducatiounspersonal eng Formation continue an dem Domaine kënnen unzebidden.

D'Regierung huet och, am Kader vum Accord vum 27 Januar 2021 mat dem Consistoire israélite, d'Klouschter vu Cinqfontaines kaaft, wou ab 2022, wéi am Kader vun der Zeremonie de 4 Juli 2021 vum Här Educatiounsminister annoncéiert, e "*Centre d'éducation à la citoyenneté et de la mémoire des victimes de la Shoah*" soll entsoen.

D'Themen déi an dësem Zentrum behandelt wäerte ginn, sinn ënnert anerem:

- D'Shoah an och méi spezifesch, d'Shoah zu Lëtzebuerg;
- Exil a Migratioun;
- Mënscherechter;
- Diversitéit an Toleranz;
- D'Bekämpfung vun Haass Rieden; an
- Diskriminéierung verstoen a bekämpfen.

D'Konzept vum Site ass och zesumme mat der Fondation luxembourgeoise pour la Mémoire de la Shoah ausgeschafft ginn. De Site wäert duerno vum Service national de la jeunesse zesumme mam Zentrum fir politesch Bildung géréiert ginn.